

19. Viris piis rursus profectis, RÁMAS *Rákshasorum* et simiorum principes etiam dimisit, quibus ipsa SÍTA manibus suis eximia munera obtulerat, et qui præ gaudio haud animadverterant, mensem dimidium elapsum esse.

20. Atque RÁMAS *Pushpakum* currum, cogitatione sua facile impetrandum, cœli ornamentum, deorum hosti una cum vita ereptum, ut *Kailásæ* dominus rursus eo veheretur, dimisit.

21. Ita secundum patris jussum habitatione in sylva finita, RÁMAS, imperium adeptus, ut Honestum, Utile atque Dulce, sic etiam fratres suos minores justa ratione tractabat.

22. Atque pietate actus omnibus suis matribus parem exhibebat reverentiam, veluti copiarum cœlestium dux *Krittikis* nymphis, sex oribus suis ex uniuscujusque mammis lac hauriens.

23. Mundus per eum, a cupiditate remotum, dives erat; per eum, periculorum timores repellentem, negotia sua peracta videbat; per eum moderatorem patre præditus erat; atque filio præditus, per eum, dolores removemtem.

24. Ille civium negotia respiciens, tempore opportuno cum *Videhæ* regis filia se oblectavit, congressus quasi cum LAKSHMI, quæ, voluptatis cupida, SÍTÆ corpus pulchrum induisset.

25. Iis, qui ex optato sensuum voluptatibus fruebantur, in ædibus picturis ornatis, dolores etiam, quos in *Dandaka* sylva perpassi erant, in memoriam revocati, voluptatem præbebant.

26. Tum vero SÍTA tenerrimo suo adspectu, oreque *saræ* graminis instar pallido, sine verbis graviditatem illius indicante, marito suo lætitiā attulit.

27. In gremio positam illam, tenero corpore præditam, cujus mammarum papillæ colorem mutaverant, pudibundam, pulchram, maritus lætus quid cuperet interrogavit.

28. Illa iterum adire desideravit sylvas sacras ad *Bhágírathis* ripas, sacro gramine abundantes, oryzæ culmis, per bestias decerptis, quasi oblationibus plenas, ubi eremitarum filiæ amicitia conjunctæ vivebant.

29. RAGHUIDARUM fortissimus, hoc desiderium ei pollicitus, cum